



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25
Vogošća, 01.04.2025. godine

VIJEĆNIČKA PITANJA
POSTAVLJENA NA 5. REDOVNOJ SJEDNICI OPĆINSKOG VIJEĆA VOGOŠĆA
održanoj 27.03.2025. godine

Vijećnik **Selimović Bego (u ime Kluba vijećnika SDA)** postavio je slijedeće vijećničko pitanje:

- 5/1.** U ime građana MZ Svrake i građana Krivoglavaca postavljam pitanje koliko je planirano izgradnje nastavka puta na dionici Svrake IV-Vogošćanska petlja i kad možemo očekivati početak radova?

Obrazloženje:

Obzirom da je navedena dionica u programu prioriteta, pretpostavljam da su riješeni imovinsko-pravni odnosi i da je izvršena revizija izvedbenog projekta, a imamo u toku zime značajnih problema oko prijevoza učenika iznad mezarja Boranje, jer je taj dio dionice nepregledan i uzak i potrebno je prioritarno pristupiti realizaciji istog.

Vijećnik **Efendić Emir (u ime Kluba vijećnika S BiH)** postavio je slijedeća vijećnička pitanja:

- 5/2.** Kad će doći do rješavanja pitanja vodosnadbjevanja naselja Jošanički potok u ulici Gornja Jošanica I, od broja 22. od 55. U ovom naselju oko 50 domaćinstava nema riješeno pitanje vodosnadbjevanja već se napajaju sa individualnog rezervoara i alternativnim putem dovozom cisterni.
- 5/3.** Naselje Gornja Jošanica je u zimskom periodu ostalo bez alternativnog snadbjevanja vodom, također izostalo je i snadbjevanje i dovoz vode cisternom. Postavljam pitanje zašto je snadbjevanje vodom ovog naselja putem cisterne izostalo i zbog čega.

Vijećnik **Turković Faruk (u ime Kluba vijećnika SDA)** postavio je slijedeća vijećnička pitanja:

- 5/4.** obraćam se službi i JU „Kulturno-sportski centar“ Vogošća sa upitom o mogućnosti korištenja kino sale u Kulturno-sportskom centru Vogošća. Konkretno, zanima me:
1. Da li je moguće koristiti kino salu uz prethodnu najavu i pod kojim uslovima?
 2. Da li je potrebno osigurati posebne dozvole ili platiti autorska prava za prikazivanje filmova i drugih audiovizuelnih sadržaja?
- Smatram da bi redovno korištenje kino sale značajno doprinijelo kvaliteti društvenog i kulturnog života u Vogošći, a istovremeno omogućilo JU „Kulturno-sportski centar“ Vogošća dodatne prihode kroz realizaciju ove i sličnih aktivnosti.
- 5/5.** obraćam se JU „Kulturno-sportski centar“ Vogošća sa upitom o kriterijima prema kojima se dodjeljuju termini za treninge i takmičenja u sportskim objektima Kulturno-sportskog centra. Konkretno, zanima me:
1. Po kojim kriterijima se vrši raspodjela termina?
 2. Da li su prioritetni sportski klubovi koji svojim članstvom, masovnošću i sportskim rezultatima najviše doprinose razvoju sporta i promociji Općine Vogošća?
 3. Molim da mi dostavite zvanične kriterije i procedure koje se primjenjuju prilikom dodjele termina kako bi se osigurala transparentnost i pravičnost u korištenju sportskih objekata.

Vijećnica **Džano Emina (u ime Kluba vijećnika NiP)** postavila je slijedeće vijećničko pitanje:

5/6. Na jednoj od prethodnih sjednica uputila sam inicijativu za ponovno iscrtavanje pješačkih zona na nekoliko lokacija u naseljima Hotonj i Kobilja Glava, a koje se nalaze u blizini škola, međutim, ništa od navedenog nije urađeno. Molim odgovor službe, zašto se nije djelovalo po ovom pitanju?

Vijećnik **Omerović Denis (u ime Kluba vijećnika SDP)** postavio je slijedeća vijećnička pitanja:

5/7. S obzirom da je odgovor na inicijativu 3/23. koju sam pokrenuo na 3. redovnoj sjednici Općinskog vijeća za održavanje visokog i niskog rastinja uz prugu, na dijelovima gdje pruga prolazi kroz naselja, izostao od strane Željeznica FBiH i nisam siguran kada ćemo dobiti isti, da li općinske službe mogu poslati urgenciju za odgovor, s obzirom da se bliži period godine kada je najpovoljnije za čišćenje?

5/8. Ko je zadužen za održavanje fontane ispred Kulturno-sportskog centra i zašto ista nije u funkciji godinama unazad?

Vijećnik **Škoro Hamdija (u ime Kluba vijećnika Naprijed BiH)** postavio je slijedeće vijećničko pitanje:

5/9. Pitam nadležnu općinsku službu da li je u planu i kada će biti sanirana ul. Gornja Jošanica I uz Jošanički potok. Pomenuta ulica se već duže vremena nalazi u lošem stanju, te je otežano odvijanje saobraćaja i kretanje pješaka.

Vijećnik **Bogilović Enis (u ime Kluba vijećnika NiP)** postavio je slijedeća vijećnička pitanja:

5/10. Postavljam pitanje prema Ministarstvu saobraćaja, da li će se i kada postavljati zaštitna mreža za trolni vod na pasarele Kobilja Glava i Hotonj.

Obrazloženje:

Obilaskom pomenutih pasarela, uočeno je da se trolni vod (žice) visokog napona može dohvatiti rukom ili nekim drugim predmetom sa pasarele. Samim tim, ugrožava se život znatiželjne djece i drugih lica.

5/11. Postavljam pitanje prema Ministarstvu saobraćaja i firmama koje su izvodile radove za trolejbusku mrežu prema Vogošći, kada će se sanirati potok oborinskih voda na magistralnom putu ispod Adil-begove džamije na Kobiljoj Glavi i dio saobraćajnice od Kobilje Glave prema Gornjem Hotonju.

Obrazloženje:

Šalovanjem i montažom stubova za trolejbusku mrežu, napravljeni su vodeni džepovi (bazeni) u potoku ispod džamije, stvarajući veliki rizik za novo klizište. Pomenuta lokacija je već imala jedno klizište koje se nalazi 50 metara iznad. Pored magistralnog puta od Kobilje Glave prema Gornjem Hotonju je položen visokonaponski kabal i zatrpan, a zemljište nije vraćeno u prvobitno stanje, stvarajući vizuelno ružan izgled. Ovom prilikom apelujem na inspeksijski nadzor ovih lokacija.

Vijećnica **Karović Amra (u ime Kluba vijećnika SDP)** postavila je slijedeće vijećničko pitanje:

5/12. Da nadležne službe poduzmu nešto u vezi divlje deponije građevinskog materijala na području Blagovca II i Tihovića.

Obrazloženje:

Na pomenutoj lokaciji zapažen je nedostatak bankine sa desne strane iz pravca Blagovca II, gdje su mještani zapazili da se ne poštuje znak zabrane odlaganja smeća koji stoji na tom mjestu, međutim očigledno nije adekvatno signaliziran, u smislu bolje zapaženosti. Odlaganjem građevinskog otpada direktno prema naselju Blagovac, mještani su ugroženi mogućim klizištem i stvaranjem nehygijskih uslova. Molim nadležne službe da obidu teren.

Vijećnica **Čomaga Almedina (u ime Kluba vijećnika SDA)** postavila je slijedeće vijećničko pitanje:

- 5/13.** U ime građana naselja Ljetovik postavljam pitanje, da li će se nastaviti radovi na asfaltiranju puta u ulici Kamenica II kod broja 48., naselje Ljetovik. Ako se planira, kada će radovi početi, ukoliko ne, koji je uzrok?

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

- 5/14.** Zašto se usvojeni materijali i dokumenti Općinskog vijeća ne postavljaju, odnosno ne ažuriraju redovno nakon svake sjednice na eCitizen platformu, gdje građani mogu iznositi svoja mišljenja, komentarisati tačke sjednica, kao i postavljati direktna pitanja Načelniku i vijećnicima?

Obrazloženje:

Dana 21.10.2024. godine izvršena je primopredaja eCitizen platforme za tri partnerske jedinice lokalne samouprave, među kojima je i naša Općina Vogošća. Ovaj potez treba pohvaliti jer pristupanjem platformi jača se mogućnost transparentne i jednostavne komunikacije između građana i lokalne vlasti. Ova inovativna platforma omogućava efikasniju komunikaciju s građanima pružanjem jednostavnih alata za slanje žalbi i upita lokalnoj samoupravi. Jedna od ključnih funkcionalnosti eCitizen platforme je mogućnost online učešća u javnim raspravama i sjednicama Općinskog vijeća. Građani mogu iznositi svoja mišljenja, komentarisati tačke sjednica te postavljati direktna pitanja načelniku i vijećnicima. Također, aplikacija omogućava slanje pritužbi putem fotografija, što olakšava identifikaciju problema u lokalnoj zajednici. Navedena aplikacija nudi mogućnost svim građanima da prate rad našeg Vijeća, dostavljaju komentare, učestvuju u javnim raspravama, postavljaju pitanja načelniku ili vijećnicima, ali i da prijave problem. eCitizen omogućava jednostavnu i transparentnu komunikaciju građana i lokalne uprave. S tim u vezi, upućujem ovo pitanje kako bismo otklonili nejasnoće i nedostatke u implementaciji platforme te pokazali zajedničku opredijeljenost za jačanje učešća građana u radu lokalne zajednice. Time bismo omogućili građanima da aktivno doprinose rješavanju problema s kojima se svakodnevno suočavaju, te unaprijedili transparentnost i odgovornost lokalne vlasti.

- 5/15.** Da li su nadležne službe upoznate s problemom javne rasvjete koji imaju građani u ulici 24. juna, od broja 44. do broja 46.?

Obrazloženje:

Stanovnici ulice 24. juna, u dijelu od broja 44. do broja 46., suočavaju se s problemom nefunkcionalne javne rasvjete. Ovaj problem značajno utiče na kvalitet života građana, njihovu sigurnost, kao i sigurnost u saobraćaju, naročito u večernjim satima. Nedostatak rasvjete povećava rizik od saobraćajnih nesreća, otežava kretanje pješaka – posebno djece i starijih osoba – te predstavlja sigurnosni rizik, jer smanjena vidljivost može olakšati izvršenje krivičnih djela poput krađa ili vandalizma. Stavljanje u funkciju javne rasvjete u ovom dijelu ulice riješilo bi navedene probleme i doprinijelo većoj sigurnosti svih građana. S tim u vezi, postavljam ovo vijećničko pitanje kako bi se utvrdio status rješavanja ovog problema i eventualne mjere koje nadležne službe planiraju poduzeti.

Vijećnik **Piknjač Admir (u ime Kluba vijećnika NiP)** postavio je slijedeća vijećnička pitanja:

- 5/16.** Pitam nadležnu službu zašto se dostavljaju materijali za sjednice Općinskog vijeća i po kojoj Odluci u printanoj, pisanoj formi političkim subjektima, općinskim organizacijama koje participiraju unutar Općinskog vijeća i kome se još dostavljaju u printanoj formi, a nije se omogućilo izjašnjavanje vijećnika koji žele da dobiju materijal Općinskog vijeća u printanoj formi radi lakše i adekvatne pripreme za sjednice Općinskog vijeća?

Obrazloženje:

Iako je u pitanju jedna dobra inicijativa od strane kolege vijećnika Armin Hebiba koju je usvojilo Općinsko vijeće sa namjerom smanjenja troškova i rada na printanju materijala za sjednice Općinskog vijeća smatram da je odluka diskriminirajuća prema kolegama koji nisu u mogućnosti pripremiti se za sjednicu Općinskog vijeća na način da materijal koriste u elektronskoj formi putem e-mail adrese. Nepoštivanje i preglasavanje prava izabranih kolega vijećnika, bez mogućnosti izjašnjavanja i zahtjevom da im se omogući printani materijal za sjednice Općinskog vijeća je diskriminirajući. Na prošlim sjednicama Općinskog vijeća podnosio sam i inicijativu da se općinska Velika sala u kojoj se održavaju sjednice Općinskog vijeća adaptira i prilagodi salama po uzoru na druge općine sa mogućnošću diskusije sa

mjesta, monitorom, laptopom, mikrofonom i drugim potrebnim sredstvima, kako bi unaprijedili rad sjednice Općinskog vijeća, skratili vrijeme nepotrebnih izlazaka za govornicu i imali učinkovitiji i produktivniji rad, nažalost inicijativa je bila preglasana. Još jednom naglašavam da je potrebno da se izjasni svaki vijećnik na koji način želi da mu se dostavlja materijal za sjednice Općinskog vijeća kako bi se isti adekvatno pripremili za sjednice.

- 5/17.** Pitam nadležnu općinsku službu u čijoj je nadležnosti nadvožnjak (pasarela) preko magistralnog puta M-18 u Donjem Hotonju, kao i samim tim ko je odgovoran za njeno održavanje i sigurnost prelaska pješaka preko iste, obzirom da nikada nisam dobio odgovor na pokrenutu inicijativu u vezi pomenute pasarele?

Obrazloženje:

Nadvožnjak, odnosno pasarela koja je namijenjena isključivo za prelaz pješaka preko magistralnog puta M-18 u Donjem Hotonju, kako sam i naveo u postavljenoj inicijativi na predhodnim sjednicama Općinskog vijeća, nalazi se u vrlo lošem i dotrajalom stanju. Željezna konstrukcija od čega je izgrađen jedan dio je dotrajala (korozirala) do te mjere da je pitanje dana kada će se urušiti i srušiti na magistralni put M-18, a betonsko stepenište je skoro neprohodno. U pitanju je sigurnost stanovnika, a pogotovo djece preko koje prelaze svakodnevno. Naveo sam i da je predmetna pasarela prije nekoliko godina pala na magistralni put i osim materijalne štete, nije bilo štete na vozilima koja su prolazila ispod iste, niti je bilo nastradalih pješaka, što je bila ogromna sreća u tom trenutku. Napominjem da je potrebno hitno reagovati i ispitati nosivost i ispravnost pomenute pasarele, te tražiti od nadležnih i izvođača radova test, tj. garanciju za ispravnost i sigurnosti iste. U prilogu ovog pitanja su i slike pasarele u trenutnom stanju.

Vijećnik **Pašagić Almir (u ime Kluba vijećnika SDP)** postavilo je slijedeća vijećnička pitanja:

- 5/18.** Kada će ispred DZ Vogošća biti postavljenje nove klupe za građane/pacijente općine Vogošća.

Obrazloženje:

S obzirom na činjenicu da je u našoj općini u posljednje vrijeme postavljen veliki broj novih klupa (što je pohvalno), građani/pacijenti su uočili i izrazili nezadovoljstvo nepostavljanja istih ispred DZ Vogošća. Nadam se da će građani/pacijenti biti blagovremeno informisani sa što skorijom realizacijom njihovog zahtjeva za promjenom klupa ispred DZ Vogošća, kao općine društveno odgovorne prema javnim institucijama.

- 5/19.** Izgradnja I transferzale kao najznačajnijeg projekta za saobraćajnu infrastrukturu Kantona Sarajevo.

Obrazloženje:

Veliki broj građana pozdravlja dosadašnji tok izgradnje I transferzale, a posebno izgradnju tunela „Kobilja Glava“. Za glavni grad Bosne i Hercegovine, ali i za Općinu Vogošća, I transferzala bi trebala biti žila kucavica u saobraćajnom povezivanju Sarajeva sa drugim gradovima Bosne i Hercegovine, a ujedno i trasa u razvoju ekonomskog napretka Kantona Sarajevo. Građane općine Vogošća interesira da li će biti u mogućnosti u 2025. godini otvaranje saobraćajnice na relaciji Šip-Hotonj.

Dostaviti:

1. Naslovu
2. a/a

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25

Vogošća, 01.04.2025. godine

INICIJATIVE POKRENUTE
NA 5. REDOVNOJ SJEDNICI OPĆINSKOG VIJEĆA VOGOŠĆA
održanoj 27.03.2025. godine

Na 5. redovnoj sjednici Općinskog vijeća vijećnik **Selimović Bego** (u ime Kluba vijećnika **SDA**) pokrenuo je slijedeće inicijative:

- 5/1.** U ime građana MZ Svake pokrećem inicijativu da se na magistralnom putu Sarajevo-Tuzla i Tuzla-Sarajevo postave znakovi da se na lijevoj strani rijeke Bosne nalazi naselje Svake, da bi se olakšao način kako doći do naselja Svake, koje ima povijesni značaj.

Obrazloženje:

Postavljanje znakova je neophodno, jer ko dolazi u Svake, a nije iz bližeg okruženja, zove telefonom da pita kako doći u Svake. Mislim da je ovo jedinstven primjer da nema znakova gdje se nalazi (kako se nalazi) određeno naselje. Molimo nadležnu službu da ovu inicijativu prosljedi na adresu koja je nadležna da realizuje ovu inicijativu.

- 5/2.** Pokrećem inicijativu u ime građana naselja Poturovići i Ljubina da nadležna služba poduzme potrebne aktivnosti uklanjanja grana na drvoredu tuja u dužini cca 100 m na ulazu u naselje Poturovići sa lijeve strane lokalnog puta koji vodi u naselje Poturovići i Ljubina.

Obrazloženje:

Obzirom da su izgrađena nova naselja Poturovići i Ljubina i da još traje intenzivna gradnja s desne strane kasarne „Enver Šehović“ u Semizovcu, potrebno je obezbijediti i bolji ambijent za ista. Lokalni put za ovo naselje nije adekvatan, nema dovoljno širine, a da ne govorimo o trotoarima. Pored svega toga, neko je na ulazu u Poturoviće možda i prije agresije na R BiH uz samu ivicu puta posadio drvored tuja. Tuje su uz samu saobraćajnicu, dragi Bog je dao da su one kvalitetne i porasle, grane istih su od 50 cm do 1 m i proširene su na lokalni put. Ovdje je zakazao ljudski faktor da to održava, a lokalna zajednica ne koristi svoje mehanizme da to riješi i da onako uzak kolovoz učini bezbjednijim, jer takvo stanje ugrožava učesnike u saobraćaju i pješake.

Vijećnik **Gluhović Alija** (u ime Kluba vijećnika **Naprijed BiH**) pokrenuo je slijedeće inicijative:

- 5/3.** Pokrećem inicijativu prema nadležnoj općinskoj službi za uređenje igrališta u Bušći, MZ Kobilja Glava.

Obrazloženje:

Pomenuto igralište nalazi se u lošem stanju. Većina mobilijara je uništena, a pored toga na igralištu se nalazi velika količina otpada, te kao takvo nije adekvatno za boravak djece i omladine. Obzirom da se nalazimo pred sunčanim danima i da postoji potreba za korištenje istog, molim nadležnu općinsku službu da pokrene potrebne procedure za saniranje istog.

- 5/4.** Pokrećem inicijativu prema nadležnoj općinskoj službi da izvrši saniranje rešetki za propust vode oko fontane koje se nalaze na Trgu žrtava genocida u Srebrenici ispred sportske dvorane „Amel Bečković“.

Obrazloženje:

Veći dio propusta za vodu na trgu oko fontane je slomljen i nije siguran pogotovo za naše najmlađe koji tu u parku provode najviše vremena. Molim nadležnu općinsku službu da iznađe način za rješavanje ovog problema.

Vijećnik **Efendić Emir (u ime Kluba vijećnika S BiH)** pokrenuo je slijedeće inicijative:

- 5/5.** Pokrećem inicijativu radi poboljšanja sigurnosti saobraćaja potrebno je da se na raskrsnici ulice Uglješići iza parking prostora WOG postavi saobraćajno ogledalo.

Obrazloženje

Navedena ulica je zbog svoje konfiguracije i položaja veoma nepregledna, te zbog toga predstavlja opasnost za učesnike u saobraćaju prilikom prolaska kroz istu. Postavljanje ogledala bi učesnicima u saobraćaju omogućilo bolju preglednost odvijanja saobraćaja u raskrsnici i olakšalo sigurno uključivanje u saobraćaj.

- 5/6.** Pokrećem inicijativu za sanaciju odnosno nasipanje i popravku puta koji vodi od mosta kod srednje škole prema ulici Uglješići.

Obrazloženje

Navedeni put je u veoma lošem stanju i nije ga moguće koristiti za saobraćaj vozila, a to mu je osnovna namjena. Navedeni put je jedini alternativni ulaz i izlaz u ulicu Uglješići u slučaju intervencije hitnih službi, kao i najbliža komunikacija sa urbanim dijelom Vogošće za stanovnike navedene ulice.

Vijećnica **Curić Samira (u ime Kluba vijećnika SDP)** pokrenula je slijedeće inicijative:

- 5/7.** Na temelju zabrinutosti roditelja djece koja pohađaju JU Vrtić „Ljiljani“, pokrećem inicijativu za postavljanje zaštitne ograde oko igrališta iza vrtića. Naime, djeca svakodnevno izlaze na igralište koje trenutno nema zaštitnu ogradu, što predstavlja ozbiljan sigurnosni rizik, s obzirom na mogućnost da dijete u bilo kojem trenutku istrči na ulicu. Nedavni nesretni događaj u neposrednoj blizini vrtića dodatno je ukazao na hitnost rješavanja ovog problema. Stoga predlažem da Općina Vogošća postavi zaštitnu ogradu oko igrališta radi sigurnosti djece i olakša nadzor odgajateljima. Molim da se ova inicijativa uzme u razmatranje.

- 5/8.** Pokrećem inicijativu za postavljanje solarne klupe u parku kod Spomen obilježja Civilnim žrtavama rata. Solarne klupe postale su globalni trend u europskim zemljama, a njihovu važnost prepoznali su i pojedini bosanskohercegovački gradovi. Ove klupe omogućavaju bluetooth povezivanje, internet vezu, svjetlo, hlađenje tokom ljetnih dana, te USB i bežično punjenje mobilnih telefona, tableta i laptopa. Postavljanjem solarne klupe na predloženu lokaciju unaprijedili bismo funkcionalnost javnog prostora, omogućili građanima dodatne pogodnosti, te istovremeno promovisali održive tehnologije i ekološki prihvatljiva rješenja. Molim da se ova inicijativa uzme u razmatranje.

Vijećnica **Šabić Dalia (u ime Kluba vijećnika DF)** pokrenula je slijedeće inicijative:

- 5/9.** Pokrećem inicijativu za refundaciju troškova printanja i uveza završnih radova za bachelor i magistarske studije

Obrazloženje:

Općina Vogošća kontinuirano podržava mlade i njihovo obrazovanje kroz različite stipendije i projekte. Završetak visokoškolskog obrazovanja predstavlja značajan korak u profesionalnom razvoju studenata, ali istovremeno nosi određene finansijske troškove, uključujući printanje i uvez završnih radova, koji su obavezni za odbranu i arhiviranje na fakultetima. S obzirom na to da ovi troškovi predstavljaju dodatno opterećenje za studente i njihove porodice, predlažem da Općina Vogošća razmotri mogućnost refundacije troškova printanja i uveza završnih radova za studente koji imaju prebivalište na području naše općine. Ova inicijativa ima za cilj olakšati završetak studija mladima iz Vogošće i pružiti dodatnu podršku njihovom obrazovanju.

- 5/10.** Pokrećem inicijativu za adaptaciju podvožnjaka na raskršću ulica Tome Mendeša i Igmanska.

Obrazloženje:

Pokrećem inicijativu za adaptaciju podvožnjaka na raskršću ulica Tome Mendeša i Igmanske, kako bi se omogućio siguran i nesmetan prolaz osobama sa smanjenom pokretljivošću, roditeljima sa dječijim kolicima i starijim osobama. Trenutno postojeće rješenje, koje se oslanja isključivo na stepenice, nije prilagođeno ovim kategorijama građana, što im onemogućava normalno korištenje podvožnjaka. Pored stepenica nalazi se nešto što je zamišljeno kao rampa za silazak ali uopšte ne pruža mogućnost silaska sa dječijim ili invalidskim kolicima. Podvožnjak na ovoj lokaciji je jedini siguran način prelaska ulice, ali zbog nepristupačne infrastrukture, građani koji koriste invalidska pomagala, dječija kolica ili imaju

otežano kretanje primorani su praviti obilazak od 1 km kako bi se vratili na lokaciju sa druge strane podvožnjaka. Rješenje je izgradnja pristupnih rampi sa adekvatnim nagibom na obje strane podvožnjaka.

Vijećnik **Turković Faruk (u ime Kluba vijećnika SDA)** pokrenuo je slijedeće inicijative:

5/11. Pokrećem inicijativu za organizaciju godišnjeg izbora Sportiste godine Općine Vogošća. Cilj ove inicijative je promocija sporta, afirmacija uspješnih sportista i sportskih kolektiva te podsticanje mladih na aktivno bavljenje sportom.

Obrazloženje:

Općina Vogošća ima bogatu sportsku tradiciju i brojne uspješne sportiste, klubove i pojedince koji zaslužuju priznanje za svoj rad i rezultate. Smatram da je važno institucionalno vrednovati njihov trud i dostignuća kroz organizaciju ovog izbora, koji bi postao tradicionalan događaj od značaja za lokalnu zajednicu. Ciljevi i značaj manifestacije:

- Promocija sportskih uspjeha i sportskih kolektiva s područja Općine Vogošća
- Podsticanje mladih na aktivno bavljenje sportom
- Očuvanje i razvoj sportske kulture u lokalnoj zajednici
- Jačanje veza između sportskih klubova, institucija i privrednih subjekata
- Unapređenje imidža Općine Vogošća kao sportskog centra.

Predloženi koraci za realizaciju:

1. Formiranje inicijativnog odbora – uključivanje predstavnika Općine, sportskih klubova, sportskih saveza i medija.
2. Definisanje kategorija i kriterija izbora – predlaganje kategorija poput: najbolji sportista, najbolja sportistkinja, najbolji mladi sportista, najbolji sportski kolektiv, sportski radnik godine itd.
3. Pribavljanje finansijske podrške – uključivanje privrednih subjekata u osiguravanje nagradnog fonda radi podizanja kvaliteta manifestacije.
4. Medijska promocija i uključivanje javnosti – informisanje građana putem lokalnih medija i društvenih mreža te omogućavanje glasanja u određenim kategorijama.
5. Organizacija svečane ceremonije dodjele priznanja – definisanje datuma i lokacije događaja te priprema priznanja i nagrada za nagrađene.

Zaključak: Ova inicijativa ima potencijal da postane važan godišnji događaj u Općini Vogošća i značajno doprinese afirmaciji sporta i sportista u našoj općini.

5/12. Pokrećem inicijativu za izmjenu kriterija za dodjelu sportskih stipendija Općine Vogošća. Kao što je poznato, nizom mojih inicijativa uvedena je dodjela sportskih stipendija u Općini Vogošća. S tim u vezi, predlažem izmjene kriterija za dodjelu ovih stipendija.

Obrazloženje:

Prema dosadašnjim pravilima, pravo na apliciranje imali su isključivo stanovnici Vogošće koji treniraju u vogošćanskim klubovima. To isključuje mlade sportiste koji dolaze iz drugih općina, ali treniraju u Vogošći, kao i vogošćane koji treniraju u klubovima van Vogošće. S obzirom na njihov doprinos razvoju sporta i promociji Općine Vogošća na domaćim i međunarodnim takmičenjima, smatram da je potrebno razmotriti izmjenu ovog kriterija kako bi i oni mogli aplicirati. Također, stipendije su do sada bile ograničene na sportiste do 18 godina starosti, dok stariji sportisti ostvaruju prava na federalnom nivou. Smatram da bi, ukoliko se osiguraju potrebna finansijska sredstva, trebalo omogućiti i sportistima starijim od 18 godina da konkurišu za stipendiju, kako bi imali dodatnu podršku za nastavak svoje sportske karijere.

Zaključak: Ove izmjene bi omogućile širu podršku sportistima i dodatno ojačale sportski razvoj Općine Vogošća.

Vijećnica **Džano Emina (u ime Kluba vijećnika NiP)** pokrenula je slijedeće inicijative:

5/13. Pokrećem inicijativu u ime zabrinutih građana, mahom roditelja nadležnima da se autobusko stajalište Hotonj (iz pravca grada) ne ukida. Građani su dobili informaciju da će se zbog rekonstrukcije koja je trenutno u toku, potpuno ukinuti autobusko stajalište, što bi građanima tog dijela naselja Hotonj otežalo svakodnevne aktivnosti. Slijedeće autobusko stajalište je dosta udaljeno od navedenog dijela naselja Hotonj. Starijim licima koja redovno koriste javni gradski prevoz, ali i učenicima bi ukidanje ove stanice oduzimalo dosta vremena, otežalo svakodnevne obaveze. S toga, u ime građana koji su mi se obratili zahtijevam da se navedena stanica ne ukida, odnosno da se pronađe nova adekvatna lokacija na kojoj bi se autobus mogao nesmetano zaustaviti, a građani sigurno kretati.

5/14. Pokrećem inicijativu u ime građana naselja Hotonj, tačnije ulice Ramiza Alića za postavljanje vibra-traka prije i poslije uzdignute pješačke zone. Građani svakodnevno svjedoče ugrožavanju sigurnosti djece usljed brže vožnje neodgovornih vozača. Trenutno je u tom dijelu ulice premješten i dolazak i odlazak učenika OŠ "Izet Šabić", jer je u toku rekonstrukcija donje ulice. Građani zahtijevaju hitnu intervenciju nadležnih, kako bi se djeci osigurao sigurniji odlazak/dolazak iz škole i u školu.

Vijećnik **Omerović Denis (u ime Kluba vijećnika SDP)** pokrenuo je slijedeće inicijative:

5/15. Pokrećem inicijativu za uređenje i čišćenje korita rijeke Bosne, koja svojim tokom prolazi kroz naselja Semizovac i Svrake.

Obrazloženje:

Na temelju zahtjeva građana Semizovca i Svraka, pokrećem inicijativu za čišćenje i uređenje korita rijeke Bosne. Korito rijeke je zaraslo drvećem, šibljem i zagađeno otpadom, što ugrožava ekološki sistem i sigurnost građana. Predlažem čišćenje korita od vegetacije i otpada, sanaciju obala kako bi se spriječile erozije i očuvala stabilnost zemljišta, te ekološku sanaciju rijeke za poboljšanje kvalitete okoliša.

5/16. Pokrećem inicijativu za izgradnju trotoara uz magistralni put od autobusnog stajališta prije naselja Poturovići – Ljubina, do skretanja za navedena naselja.

Obrazloženje:

Predlažem izgradnju trotoara uz magistralni put Vogošća - Semizovac, tačnije na dionici od autobusnog stajališta prije naselja Poturovići - Ljubina, do skretanja za navedena naselja, u dužini od oko 50 metara. Trenutno pješaci, koji izlaze iz autobusa, prisiljeni su kretati se uz odvodni kanal ili cestom, što predstavlja ozbiljan sigurnosni rizik, posebno u uvjetima lošeg vremena poput kiše i snijega. Izgradnja trotoara na ovoj dionici osigurala bi sigurnost pješaka i smanjila opasnost od nesreća, čime bi se poboljšala kvaliteta života i sigurnost svih učesnika u prometu. Molim nadležne institucije da razmotre i realiziraju ovu inicijativu

Vijećnik **Glija Eno (u ime Kluba vijećnika DF)** pokrenuo je slijedeće inicijative:

5/17. Pokrećem inicijativu za zamijenu razbijenog ogledala Menjak kod broja 39.

Obrazloženje:

Staro ogledalo je razbijeno, te je isto potrebno zamijeniti.

5/18. Pokrećem inicijativu za sanaciju i uređenje prilaza i stepeništa zgradama kod broja 28. i 32. u ul. Omladinska.

Obrazloženje:

Prilazi i stepeništa kod ovih objekata su oštećeni, neravni, te predstavljaju ozbiljan sigurnosni rizik za stanare i prolaznike. Posebno su problematični u kišnim i zimskim uslovima, kada postaju klizavi i teško prohodni. Predložena sanacija značajno bi unaprijedila sigurnost i kvalitet života stanara ul. Omladinska.

Vijećnica **Salčin Sabiha (u ime Kluba vijećnika SDA)** pokrenula je slijedeću inicijativu:

5/19. Pokrećem inicijativu prema nadležnoj općinskoj službi da se u postojeću Odluku o sječi i potkresivanju stabala na području općine Vogošća dodaju novi član/članovi koji bi regulisali obavezu održavanja privatnih parcela koji graniče sa saobraćajnicama, drugim objektima, kao i između dvije susjedne parcele.

Obrazloženje:

Na osnovu potrebe za unaprijeđenjem sigurnosti i estetike javnih površina, predlažem da nadležna služba u što kraćem vremenskom roku pokrene aktivnosti u vezi donošenja izmjena i dopuna Odluke o sječi i potkresivanju stabala na području općine Vogošća. Potrebno je da se u naprijed navedenu Odluku uvrsti član/članovi koji bi regulisali obavezu održavanja privatnih parcela koje graniče sa saobraćajnicama, drugim objektima, kao i između dvije susjedne privatne parcele, a sve u cilju sprečavanja ugrožavanja saobraćaja, pješaka i infrastrukture usljed neodržavanja istih. Dodavanjem ovih članova u Odluku o sječi i potkresivanju stabala bi se regulisalo da su i vlasnici privatnih parcela u obavezi iste urediti i održavati. Ova inicijativa ima za cilj poboljšanje sigurnosti u saobraćaju, zaštitu komunalne infrastrukture, te unapređenja estetskog izgleda kompletnog područja naše općine.

Vijećnik **Škoro Hamdija (u ime Kluba vijećnika Naprijed BiH)** pokrenuo je slijedeće inicijative:

- 5/20.** Pokrećem inicijativu u ime građana općine Vogošća da nadležna općinska služba utvrdi mogućnosti i izvrši asfaltiranje dijela ulice iz Uglješića prema Srednjoškolskom centru pored rijeke.

Obrazloženje:

Pomenuti put je jednim dijelom asfaltiran, dok drugim dijelom nije, te kao takav nije u maksimalnoj funkciji, a isti bi mogao i trebao da se koristi kako za stanovnike ovog dijela Vogošće, tako i kao rasterećenje postojećeg puta.

- 5/21.** Pokrećem inicijativu za postavljanje saobraćajnog ogledala na krivini kod hotela Park prema Gornjoj Jošanici.

Obrazloženje:

Zbog oštine krivine, vozači nemaju dovoljan i adekvatan pregled, te je neophodno postavljanje saobraćajnog ogledala koje je nekad bilo tu, a zbog sigurnosti saobraćaja i pješaka.

Vijećnik **Bogilović Enis (u ime Kluba vijećnika NiP)** pokrenuo je slijedeće inicijative:

- 5/22.** Pokrećem inicijativu prema Općinskom načelniku, nadležnoj službi, Civilnoj zaštiti Kantona Sarajevo, Vatrogasnoj jedinici Vogošća i prema resornom ministarstvu, da se na parceli k.č. 1866/1, koja je u vlasništvu Općine Vogošća, a koju koristi Vatrogasno društvo Vogošća, zajedničkim dogovorom gore navedenih lica izradi projektna dokumentacija sa novom modernom zgradom, sa što boljim izlazom na magistralni put i lokalne puteve sa svjetlosnom signalizacijom, te krene dalje u izgradnju.

Obrazloženje:

Svjedoci smo da je bezbjednost naših sugrađana na prvom mjestu i da su nekad minuti od velike važnosti u spašavanju života i drugih dobara. Samim tim, Vatrogasno društvo Vogošća čini važan segment našeg društva. U želji da imamo što bolje i sposobnije vatrogasno društvo, nadam se da će ova inicijativa doživjeti svoju implementaciju.

- 5/23.** Pokrećem inicijativu prema nadležnoj službi, da se u ulici Suada Hasanovića izradi projektna dokumentacija i pristupi zamjeni vodovodne i kanalizacione mreže, da se izrade kanali i rigoli za oborinske vode, te da se produži krak kanalizacione mreže pored kuće Hodžić Mirsada. Da se u dogovoru sa Općinom Centar iznađe najbolje rješenje za nastavak odvodnje kanalizacije i oborinskih voda.

Obrazloženje:

Izlaskom na lice mjesta u ul. Suada Hasanovića, zatečeno je stanje je veoma loše. Nadzorni organ je obustavio dalje asfaltiranje koje je nemoguće uraditi zbog podzemnih voda. Na nekoj od predhodnih sjednica sam ukazivao na ovaj problem, te apelujem na općinsku službu da krajnje ozbiljno i odgovorno pristupe iznalasku rješenja ovog problema. Pored kuće Hodžić Mirsada, fekalija se izljava po livadi stvarajući nepodnošljiv miris (smrad) i u ljetnom periodu prijeti zaraznim bolestima.

Vijećnica **Karović Amra (u ime Kluba vijećnika SDP)** pokrenula je slijedeće inicijative:

- 5/24.** Pokrećem inicijativu da se riješi problem ulične rasvjete u Vogošći, sa naglaskom spoja ulice Tome Mendeša i ul. 24. juna, koja obuhvata i veliki parking.

Obrazloženje:

Izlaskom na ulice u večernjim satima zapažen je nedovoljan broj gorućih svjetala ulične rasvjete u pomentim ulicama i na parkingu koji se nalazi u ul. 24. juna. Parking je u totalnom mraku kao i obližnji dječiji park, gdje se u večernjim satima skupljaju odrasli i lica koja pokazuju elemente vandalizma, stvaraju buku i remete mir stanara. Nedovoljna rasvjeta otežava saobraćaj i samim tim dovodi u opasnost učesnike u saobraćaju i moguće saobraćajne nezgode. Stanarima i građanima Vogošće je neugodno i neprijatno šetati i kretati se u večernjim satima zbog mračnih ulica. Molim nadležne službe da obidu ulice i uvjere se u činjenično stanje. Osvjetljenjem bi ulice izgledale ljepše i sigurnije, povećao bi se i broj građana na ulicama, jer smo svjedoci da nakon što prođe 20 h u Vogošći nastane muk. (Slike u prilogu).

- 5/25.** Pokrećem inicijativu da se postave dodatne kante sa pijeskom i male kante za smeće iza nekadašnjeg marketa Sofa i u blizini Srednjoškolskog centra Vogošća.

Obrazloženje:

Zbog nedovoljnog broja kanti za smeće i kanti sa pijeskom za opuške pomentog područja podnose žalbu i molbu za postavljanjem istih. U toku velikog odmora i pri dolasku u školu djeca se skupljaju oko zgrada i bacaju opuške, te sitno smeće, čime se narušava izgled ulica i okoline stambenih zgrada. Ulice u Vogošći su prljave i neuredne. Postavljanjem dodatnih elemenata za odlaganje smeća i opušaka, ulice bi izgledale urednije, a ulazi i prilazi zgradama čistiji. Higijenski uslovi bi bili poboljšani.

Vijećnik **Glija Avdo (u ime Kluba vijećnika DF)** pokrenuo je slijedeće inicijative:

- 5/26.** Pokrećem inicijativu za montažu info displeja sa redovima vožnje i dolascima vozila te montažu velikog sata na početnoj stanici Braće Kršo

Obrazloženje:

Početna stanica Braće Kršo predstavlja jedno od ključnih saobraćajnih čvorišta u ovoj općini, ali trenutno nema adekvatne informativne infrastrukture koja bi putnicima omogućila pravovremene informacije o polascima i dolascima vozila. Montažom info displeja i velikog sata postigli bi se sljedeći ciljevi:

- Povećanje informisanosti putnika o redovima vožnje i stvarnim dolascima vozila,
- Smanjenje gužvi i čekanja na stanici, jer bi građani imali tačne podatke o vremenu dolaska vozila,
- Modernizacija i poboljšanje javnog prevoza, u skladu s praksama savremenih urbanih sredina,
- Povećanje tačnosti i efikasnosti saobraćaja,
- Estetsko i funkcionalno unapređenje stanice, što bi doprinijelo ugodnijem čekanju putnika.

Prijedlog rješenja:

- Postavljanje digitalnog info displeja sa ažurnim podacima o dolascima i polascima vozila,
- Montaža velikog sata kako bi putnici imali uvid u tačno vrijeme,
- Osiguravanje održavanja displeja i sata u okviru redovnog plana održavanja saobraćajne infrastrukture.

- 5/27.** Pokrećem inicijativu za sanaciju i ponovno stavljanje u funkciju stepeništa kod zgrada broj 13. i 15. u Omladinskoj ulici (prekoputa vrtića Ljiljani) prema ulici Safeta Krupića i Džindinom brdu.

Obrazloženje:

Stepenište koje je nekada služilo kao pješačka komunikacija između Omladinske ulice i dijela naselja koji vodi prema ulici Safeta Krupića i Džindinom brdu sada je potpuno zapušteno, obraslo vegetacijom i u tolikoj mjeri oštećeno da se više ne može koristiti. Sanacijom i ponovnim otvaranjem stepeništa omogućilo bi se povezivanje naselja i olakšavanje kretanja građanima, poboljšanje ukupnog izgleda i funkcionalnosti javne infrastrukture.

Prijedlog rješenja:

- Kompletno čišćenje i uklanjanje zarasle vegetacije,
- Sanacija i izgradnja novih stepenica gdje su postojeće uništene,
- Postavljanje rukohvata radi sigurnosti korisnika,
- Ugradnja odgovarajuće rasvjete kako bi stepenište bilo upotrebljivo i u večernjim satima,
- Redovno održavanje kako bi se spriječilo ponovno zapuštanje stepeništa.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

- 5/28.** Pokrećem inicijativu za izmjenu kriterija konkursa za stipendiranje učenika i studenata u školskoj 2025/2026.godini prema Pravilniku o kriterijima za dodjelu stipendija učenicima i studentima i nagrađivanju izuzetno nadarenih učenika i studenata.

Obrazloženje:

Analiza konkursa za stipendiranje nadarenih učenika u općinama Kantona Sarajevo pokazuje da se stipendije u većem broju općina, nažalost ne i u našoj Općini Vogošća, dodjeljuju isključivo na osnovu akademskih postignuća, vanškolskih aktivnosti i ostalih pokazatelja nadarenosti. Uvođenjem dodatnog kriterija – provjere visine prihoda roditelja – učenici iz Općine Vogošća dovode se u neravnopravan položaj u odnosu na vršnjake iz drugih općina, čime se narušava osnovno pravo na jednak tretman. Pravilnik jasno definiše da su stipendije namijenjene nadarenim učenicima i studentima, što je istaknuto i u njegovom nazivu: Pravilnik o kriterijima za dodjelu stipendija učenicima i studentima i nagrađivanju izuzetno nadarenih učenika i studenata. Prema Konvenciji o pravima djeteta Ujedinjenih naroda, koju je ratifikovala i Bosna i Hercegovina, sva djeca imaju jednaka prava, a svaka

vrsta diskriminacije je zabranjena. Konkretno, član 28. Konvencije garantira pravo svakog djeteta na obrazovanje, dok član 29. stav a) naglašava važnost razvoja dječjih potencijala, nadarenosti, te duševnih i tjelesnih sposobnosti do njihovog punog kapaciteta. Uvođenje kriterija provjere visine prihoda roditelja u postupak dodjele stipendija nadarenim učenicima direktno krši ove principe. Stipendije za nadarene učenike trebale bi služiti isključivo kao podsticaj i nagrada za izvrsnost, a ne kao oblik socijalne pomoći. Usporedna analiza kriterija konkursa za stipendiranje u općini Centar Sarajevo: Općina Centar Sarajevo – stipendije se dodjeljuju isključivo na osnovu akademskih rezultata, osvojenih nagrada i učešća na takmičenjima. Općina Vogošća – zahtijeva dokaz o visini prihoda roditelja, čime se stvara dodatna prepreka za nadarene učenike čije porodice ne ispunjavaju prihodovni kriterij, iako su podjednako nadareni kao i njihovi vršnjaci iz drugih općina. S obzirom na navedene činjenice, pokrećem ovu inicijativu sa zahtjevom da se hitno revidiraju postojeći kriteriji Konkursa za stipendiranje nadarenih učenika u Općini Vogošća. Kriteriji za dodjelu stipendija trebali bi se temeljiti isključivo na nadarenosti i postignućima učenika, čime bi se osigurala jednakost i pravičnost za sve nadarene učenike u našoj općini. Ova inicijativa predstavlja zalaganje za jednaka prava svih nadarenih učenika, bez obzira na mjesto prebivališta ili socio-ekonomski status njihovih porodica.

5/29. Pokrećem inicijativu za sufinansiranje troškova školovanja za žrtve porodičnog nasilja.

Obrazloženje:

Sufinansiranje troškova školovanja za žrtve porodičnog nasilja na nivou općine predstavlja važan korak u pružanju podrške osobama koje su pretrpjele traumu. Lokalna samouprava može pomoći žrtvama porodičnog nasilja na različite načine, a jedan od ključnih mehanizama jeste upravo sufinansiranje njihovih troškova školovanja. Predloženi model podrazumijeva pokrivanje troškova školarina za žrtve porodičnog nasilja pod uslovom da su upisane na visokoškolsku ustanovu i da su evidentirane kao žrtve porodičnog nasilja putem nadležne Službe socijalne zaštite Općine Vogošća. Kroz ovu finansijsku pomoć, Općina može osigurati stipendije ili druge oblike podrške, omogućavajući žrtvama nastavak obrazovanja bez obzira na finansijske poteškoće koje su možda posljedica nasilja. Statistički podaci ukazuju na ozbiljnost problema porodičnog nasilja u Općini Vogošća. Tokom 2021. godine zabilježeno je povećanje slučajeva nasilja u porodici za 43,88% (98 slučajeva) u odnosu na 2015. godinu (55 slučajeva). Također, broj porodica sa rizikom od odvajanja povećan je za 34,29% u istom periodu. Ovi zabrinjavajući podaci ukazuju na potrebu za sistemskom podrškom ovoj ranjivoj kategoriji stanovništva. Općina Vogošća treba konkretnim mjerama podići svijest zajednice o potrebama žrtava porodičnog nasilja i važnosti njihovog obrazovanja. Time se ne samo smanjuje diskriminacija, već se i pruža prilika žrtvama da nastave školovanje i izgrade bolju budućnost. Primjer dobre prakse može se pronaći u Općini Centar Sarajevo, koja je od 2023. godine u sistem socijalne zaštite uvrstila pravo na sufinansiranje troškova školovanja za žrtve porodičnog nasilja. Ovaj korak predstavlja značajnu podršku ranjivim kategorijama društva, a ne postoji razlog zašto i Općina Vogošća ne bi usvojila sličnu praksu, čime bi se osigurao jednak tretman i podrška osobama koje su pretrpjele nasilje u porodici.

Vijećnik **Pašić Edin (u ime Kluba vijećnika SDA)** pokrenuo je slijedeće inicijative:

5/30. Pokrećem inicijativu na zahtjev mještana prema KJKP „Vodovod i kanalizacija“ d.o.o. Sarajevo da se izvrši sanacija vodovodne mreže, odnosno pronađe i popravi oštećenje na vodovodnoj cijevi u naselju Orahov brijeg, krak ulice od broja 42. do broja 96. Već duži vremenski period usljed oštećenja na vodovodnoj mreži dolazi do izliva vode na makadamski put koji je u jako lošem stanju i bez dodatnih oštećenja i problema koje izaziva ova voda. Mještani kraka ulice zahtijevaju rješavanje problema, kako ne bi došlo do još većih oštećenja na putu i ugrožavanja pristupa stambenim objektima.

5/31. Pokrećem inicijativu na zahtjev mještana naselja Gora prema nadležnoj općinskoj službi kao i drugim nadležnim organima da se u MZ Gora, od adrese Gora 56., do Kamenica II broj 60., postave rasvjetna tijela na stubove bez rasvjete, kao i da se postavi dodatno par novih stubova sa rasvjetom, kako bi cijela navedena ulica imala rasvjetu. Dio naselja između gore navedenih adresa je u mraku, jasno je da postoje stambeni objekti i da je stanovnicima tog dijela naselja, kako zbog lične sigurnosti i zaštite, tako i njihovih dobara potrebna javna rasvjeta.

Vijećnik **Piknjač Admir (u ime Kluba vijećnika NiP)** pokrenuo je slijedeće inicijative:

5/32. Pokrećem inicijativu da nadležna Općinska služba pripremi Odluku o izmjenama i dopunama Statuta Općine Vogošća koja se odnosi na član 52. Statuta Općine Vogošća, a koji reguliše

prava izabranih zamjenika predsjedavajućeg Općinskog vijeća, tj. njihovo pravo na prihvatanje profesionalnog angažmana na izabranu funkciju u Općinskom vijeću.

Obrazloženje:

Ispred kluba vijećnika Narod i Pravda pokrećem inicijativu da nadležna Općinska služba pripremi Odluku o izmjenama i dopunama Statuta Općine Vogošća i predloži usvajanje iste na sljedećoj sjednici Općinskog vijeća gdje bi se brisao tekst člana 52. Statuta Općine Vogošća u kojem piše da „Predsjedavajući i zamjenici predsjedavajućeg Općinskog vijeća dužnost mogu obavljati profesionalno“, a koji bi glasio da Predsjedavajući Općinskog vijeća dužnost može obavljati profesionalno. Smatram da je član 52. Statuta Općine Vogošća neprimjeren, da možda čak nije ni pravičan i da nema potrebe za angažovanjem troje izabranih vijećnika/ vijećnika na opisanim poslovima u nadležnoj Općinskoj službi, odnosno da su to još tri dodatna uposlenika u nadležnoj Općinskoj službi koja po meni diskriminirajućim članom 52. Statuta Općine Vogošća sami zapošljavaju. Predlažem da ova Odluka o izmjenama i dopunama Statuta Općine Vogošća stupi na snagu po prestanku mandata aktuelnog saziva Općinskog vijeća, odnosno da po ovoj Odluci o izmjenama i dopunama Statuta Općine Vogošća se izvrši konstituisanje i organizacija izabranih vijećnika u narednom mandatu Općinskog vijeća, kako bi na vrijeme usvojili predmetnu Odluku, a ista ne bi narušila konstituiranje i organizaciju ovog saziva Općinskog vijeća.

- 5/33.** Pokrećem inicijativu da nadležna općinska služba uputi zahtjev za popravku ili zamjenu rampe, svjetlosne i zvučne signalizacije na pružnom prelazu u Donjoj Vogošći.

Obrazloženje:

U Donjoj Vogošći na pružnom prelazu je prestala sa radom rampa i signalizacija kojom se upozorava na kretanje voza. Ovaj kvar predstavlja veliku opasnost po učesnike u saobraćaju na pomenutom dijelu puta. Tražimo od nadležne Općinske službe da uputi zahtjev nadležnim institucijama kako bi se izvršila popravka ili eventualna zamjena rampe, te popravka zvučne i svjetlosne signalizacije u što kraćem roku.

Vijećnik **Pašagić Almir (u ime Kluba vijećnika SDP)** pokrenuo je slijedeće inicijative:

- 5/34.** Pokrećem inicijativu za uspostavljanje saradnje Općine Vogošća i Općine Srebrenica kroz zajedničku saradnju Općinskih vijeća u 2025. godini.

Obrazloženje:

Na prostoru općine Vogošća živi veliku broj građana iz Srebrenice-Podrinja, te neki građani iz Vogošće i Ilijaša žive u Bratuncu i Srebrenici. Međuljudska saradnja nema alternativu. Vogošća je općina koja svojom industrijskom proizvodnjom i ekspanzijom porasta broja stanovništva želi biti lider modernog razvoja. Srebrenica danas i pored velikog bogatstva (šume, guber voda, rudnici) nije mjesto gdje raste broj stanovnika. Načelnici Općina i predsjedavajući Općinskih vijeća treba da urade analizu dodirnih tačaka i da organizuju prvu zajedničku sjednicu Općinskih vijeća u 2025. godini. Ovakav način saradnje treba da bude model povezivanja i saradnje za bolji život svih građana Bosne i Hercegovine. Kontakt osoba za uspostavljanje saradnje je Hamdija Fejzić (tel: 062/979-049).

- 5/35.** Drugi put pokrećem inicijativu prema Direkciji Željeznica Federacije BiH i Cestama Federacije BiH sa prijedlog za asfaltiranje-popločavanje zemljišta oko željezničke pruge na relaciji od kružnog toka ispred hotela Sunce do skretanja prema Staroj industrijskoj zoni kod Vatrogasnog doma.

Obrazloženje:

Kako bi naša okolina bila što uređenija i ljepša predlažem da se prostor uz željezničku prugu na relaciji od kružnog toka ispred hotela Sunce do skretanja prema Staroj industrijskoj zoni kod Vatrogasnog doma asfaltira-poploča. Asfaltiranjem-popločavanjem zemljišta oko željezničke pruge koja se jako rijetko koristi bi bila namjenjena za bicikliste, prolaz hitne pomoći, vatrogasaca, te bi ova dionica mogla nekome spasiti život i uveliko doprinjeti ljepšem i urednijem izgledu naše općine.

Vijećnik **Glijiva Bego (u ime Kluba vijećnika S BiH)** pokrenuo je slijedeće inicijative:

- 5/36.** Pokrećem inicijativu prema nadležnoj općinskoj službi da se izvrši odvoz otpada pored dječijeg igrališta u ulici Rosulje.

Obrazloženje:

U ulici Rosulje pored novoizgrađenog dječijeg igrališta ostao je otpadni materijal kojeg je potrebno ukloniti i urediti dio uz ogradu navedenog igrališta. Pored otpada na žalost nesavjesni građani počeli su odlagati i drugi otpadni materijal, te je potrebno izvršiti uklanjanje navedenog otpada i uređenje prostora oko igrališta.

5/37. Pokrećem inicijativu da se izvrši postavljanje saobraćajnih ogledala u ulici Rosulje VI kod broja 17. na spajanju dva kraka pomenute ulice.

Obrazloženje:

Obzirom da se u predhodnom periodu u dva navrata desila saobraćajna nezgoda na pomenutim krakovima u ulicu Rosulje VI kod broja 17., neophodno je postavljanje ogledala zbog nepreglednosti saobraćaja kroz pomenutu ulicu.

Vijećnik **Cvrk Ćamil (u ime Kluba vijećnika DF)** pokrenuo je slijedeće inicijative:

5/38. Pokrećem inicijativu prema Ministarstvu zdravstva Kantona Sarajevo i Javnoj ustanovi Dom zdravlja Kantona Sarajevo da se korisnicima usluga Medicine rada u Vogošći omogući korištenje laboratorijskih usluga i specijalističkih pregleda u DZ Vogošća.

Obrazloženje:

Svi korisnici usluga Medicine rada u Vogošći prinuđeni su da sve preglede, osim osnovnog pregleda kod ljekara na Medicini rada, obavljaju u DZ Otoka. U nekom ranijem periodu postojao je određeni dogovor ili ugovor koji je svima koji se liječe na Medicini rada omogućavao korištenje usluga laboratorije i specijalističkih pregleda u DZ Vogošća. Sam odlazak iz Vogošće u grad u ovakvim uslovima odvijanja saobraćaja predstavlja problem i dodatni gubitak vremena. Dosta naših sugrađana, prinuđeni su uzimati slobodne dane na poslu kako bi obavili čak i najjednostavnije laboratorijske pretrage u DZ Otoka. Smatramo da je sve ovo nepotrebno i da je na ovaj način našim sugrađanima otežan pristup korištenju zdravstvenih usluga i da su na ovaj način stavljeni u neravnopravan položaj u odnosu na stanovnike gradskih općina. Zato tražimo od Ministarstva zdravstva Kantona Sarajevo, Javne ustanove Domovi zdravlja Kantona Sarajevo i Javne ustanove Medicina rada Kantona Sarajevo da iznađu mogućnost da se u što skorijem roku ponovo potpiše ugovor kojim bi građanima Vogošće koji se liječe na Medicini rada ponovo bilo omogućeno korištenje laboratorijskih usluga i usluga ljekara specijalista koji postoje u DZ Vogošća.

5/39. Pokrećem inicijativu za uređenje pješačke staze.

Obrazloženje:

Podnosim inicijativu za uređenje poprečne pješačke staze koja povezuje dijelove Omladinske ulice – od marketa AN prema dijelu ulice koja vodi prema Uglješićima. Predmetna pješačka staza predstavlja važnu komunikaciju za stanovnike ovog područja, ali trenutno nije adekvatno uređena, što otežava sigurno kretanje pješaka, posebno u lošim vremenskim uslovima.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir